

# INUIT ATAQATIGIIT

## INATSISARTUNI



7. juni 2011

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

### **Nalakkersuisunut apeqqut:**

**Cairn Energy-p uuliasiornissaq siunertaralugu misissueqqarnermik qillerinissaminut akuersissummik qinnuteqaataanut atatillugu tusarniaanermut piffissaritaasoq sivikippallaartoq Greenpeace-imit oqaatigineqarpoq. Tusarniaanermut piffissarititaasoq qaammat sinnilaarlugu sivilissuseqarsimavoq, tassanilu atuagassat quppernerit 2000-it Cairn-imeersut ilanngunneqarsimallutik. Tusarniaanernut naliginnaasumik qanoq sivilutigisumik piffissaqartitsineq Namminersorlutik Oqartussani atorineqarpoq, matumanilu tusarniaanermi pineqartumi piffissarititaasoq naliginnaasumik atorineqartumit allaaneruva?**

**Greenpeace-imit oqaatigineqartutut pisortat paasissutissat mianernarsinnaasut ilanngunnagit paasissutissat tamakkiisumik innutaasunut tunniussimaneq ajorpaat, tusarniaanernilu naliginnaasumik tunngavigineqartartut akimorlugit iliuuseqartoqarsimanerat eqqorpa? Namminersorlutik Oqartussat tammakku tungaasigut qanoq politikkeqarpoq?**

**Aatsitassanut Ikummatissanullu Pisortaqaarfiup VVM-imut tusarniaanermilu akissutigineqartut, kiisalu Aatsitassanut Ikummatissanullu Pisortaqaarfiup nammineerluni Naalakkersuisunut innersuussutigisaat aamma Aatsitassanut Ikummatissanullu Pisortaqaarfimmit avataaniit immikkut ilisimasalinnit, ilaatigut DMU-mit pissarsiariniarsimasaat Naalakkersuisunit avammut saqqummiunneqannginneri nunatsinni inatsisinut unioqqutitsineruva?**

**Paasissutissanik avammut saqqummiussinnginnermut "nammineq nalilersuinerit" patsisigineqartoq nunatsinni inatsisinik unioqqutitsineruva?**

**Greenpeace-ip siunnersuutigisaatut siorna "drilling log" (qillerinermut allattugaatit) aamma "mud log" (marullummik atuineq pillugu allattugaatit) suliarineqartut avammut saqqummiunneqannginneri sunik tunngaveqarpoq?**

**Cairn-ip nalunaarusiaat tamarmik ukiuni tallimani tigummigallarneqarnissaannik Aatsitassanut Ikummatissanullu Pisorta qarfiup Cairn-illu akornanni isumaqatigiissusiortoqarsimasoq ilumoorpa? Taamaappat, sooq taamaaliortoqarsimava? Akuersissutinik taamaattunik tunisinerni tamanna naliginnaasuua? Aamma nalunaarusiat avammut saqqummiunneqarsinnaangitsut sorliit maannamut tiguneqarsimappat?**

**Maqisoortoqassappat paasissutissat inunnut ataasiakkaanut tunngasut aamma arlaatigut inunnut taakkununga tutsinneqarsinnaammata patsisigalugit Namminersorlutik Oqartussat upalungaarsimanissamik pilersaarut avammut saaqqummiukkusussimanngimmassuk Greenpeace-imit isornartorsiorneqarpoq. Cairn-ip upalungaarsimanissamut pilersaarutaanut Namminersorlutik Oqartussat arlaatigut naammagittaalliuteqarsimanersut, aamma Namminersorlutik Oqartussat tamanna avataaniit immikkut ilisimasalinnut nalilersortissimaneraat oqaatigineqarsinnava?**

**Niveau (killiffiit) 1 aamma 2 qaangerlugit uuliamik maqisoortoqassappat naammattumik atortorissaaruteqarnissaq qulakkeerniarlugu nunatsinni upalungaarsimanissaq pitsaanerpaatinniarlugu qanoq pilersaaruteqartoqarpa?**

**Issittumi nunani uuliamik maqisoortoqarneranik ilisimatusarnermut uuliasiornermik ingerlatsisut aningaasatigut tapeeqataanissaannik maannakkut qanoq annertutigisumik piumasaqarfigineqarpat?**

**1989-mi uuliamik assartuut Exxon Valdez Prins Williams Sund-imi annertuumik mingutsitsineranik misilittagaqarsimasasunut upalungaarsimanissamik pisariaqartitsineq pillugu, saliinermut misilittakkanik aammalu avatangiisinut innuttaasunullu kingunerisaanik misilittagaqarnernik, tassungalu ilanngullugu tamaat isigalugu aningaasartuutit katillugit qassiunersut pillugit Aatsitassanut Ikummatissanullu Pisorta qarfimmi imaluunniit Namminersorlutik Oqartussat iluani Alaska-miunut paasiniaasoqarsimava?**

**Norge-p imartaani sikoqartartuni qillerinnginnissamik politikkeqartoq Greenpeace-imit oqaatigineqarpoq, Greenpeace-ilu malillugu maqisoornikkut saliinissamut naammattumik teknologi pisariaqartitaq pigineqanngimmat Norge-mi naalakkersuisunit tunngavigineqarpoq. Tamanna ilumoorpa, aamma Namminersorlutik Oqartussanit nunat allat imartaanni sikoqartartuni qillerinernik misilittagaqartut attaveqarfigineqarsimappat?**

**Imartani sikusartuni qillerinernut NORSOK-standard naleqqussarniarlugu Namminersorlutik Oqartussat qanoq iliuuseqarsimappat? Standard-inik**

**taagorneqartut ilaat sukaterneqarsimappat, imaluunniit tamanna pisariaqanngitsutut nalilerneqarsimava?**

**Nunatsinni qillerinerni marulluk atorneqartoq imermit pisoq taamaallat atorneqarsinnaasoq nunatsinni aalajangersimasumik piumasaqaataava? Aammalu qillerinerni marulluup atorneqartup atoqqinneqartarnissaa nunatsinnit aalajangersimasumik piumasaqaataava?**

**Nunatsinni qillerinerni marullummik atortussamik toqqorsiviusinnaasunik peqanngilaq. Siunissaq eqqarsaatigalugu Namminersorlutik Oqartussani qanoq eqqarsaatersortoqarpa? Siunissami qillerinerni atortussamik marullummik toqqorsiviliornissaq pillugu pilersaaruteqartoqarpa, imaluunniit Namminersorlutik Oqartussat siunissami uuliasiornermik ingerlatsisunit qillernerinermi marulluk atorneqartoq nunatta avataanut toqqorsivinnut naleqquttunut assartorneqartarnissaa piumasaqaatigissamaarpaat?**

**Ukioq 2011-mi nunatsinni "akoorutissat aappalaartut" tons-it qassit aniatinneqarnissaat ilimagineqarpa?**

**Nunatsinni ukioq 2011-imi "akoorutissat aappalaartut" sivisuumik arroriartortartutut ilisimaneqartut tons-it qassit anianiatinneqarnissaat ilimagineqarpa?**

**Akoorutissat sivisuumik arroriartortartut ukiumoortumik qanoq annertugisumik aniatinneqarpat, taakkulu Namminersorlutik Oqartussanit akuerineqarsinnaappat ? Akoorutissat pineqartut sivisuumik arroriartortarnertik pissutigalugu "aappalaartutut" taaneqartarput, taamaattorli immikkut toqunartortaqqanngitsut aamma annertunerusumik immami uumasunut sunniunneq ajortut.**

**Ukioq 2011-mi "akoorutissat aappalaartut" tons-it qassit aniatinneqarnissaat ilimagineqarpa - tassani pineqarlutik akoorutissat toqunartortallit imaluunniit immami uumasunut sunniuteriaannaasut?**

**Akoorutissanik sungaartunik qorsunnillu taagutillit kiisalu qillerinermi marulluk avatangiisinut innarliisinnaasoq, tamarmik immikkoortinneqarsimasut aniatinneqarsinnaneri pillugit NORSOK-standard-it tamakkiisumik malinneqarpat?**

**Cairn-ip tungaanit oqaatigineqarpoq maqisoortoqarneratigut naqitsinermik millisaasussamik sullumik qillerinissaq ullunik 37-inik sivilissuseqassasoq, tassanilu qanoq ititigisumi qillerineq apeqqutaanngitsoq. Tamanna Greenpeace-ip tungaanit uparuarneqarpoq, isumaqarlutik taama qillerinissaq qanoq ititigisumi uuliamik qillerineq piffissamik atuinissamut apeqqutaalluinnassasoq. Namminersorlutik Oqartussat tamanna pillugu qanoq akissutissaqarpat?**

**Tusarniaanermi Greenpeace-ip akissuteqaataanni oqaatigineqarpoq immap kissasusaata 5 grader Celsius-inissaa Cairn-imit ilimagineqartoq isumalluarpallaarnertut isigisariaqartoq, tamannami arlaatigut uuliamik maqisoortoqassagaluarpat uuliap pissusilersorneranut apeqqutaasussaanerarlugu. Aatsitassanut Ikummatissanullu Pisortaqarfik tamanna pillugu qanoq akissutissaqarpa?**

**Greenpeace allappoq Cairn-ip uuliap pissusaanik nassuiaasiaminni uuliamik maqittoortoqassappat uuliap sermimut akulerunnermini qanoq pissuseqarnissaa qanoq kinguneqassanersoq ilanngussimanngikkaa. Tamanna oqaatigisaq ilumoorpa?**

(Inatsisartuni ilaasortaq Naaja Nathanielsen, Inuit Ataqatigiit)

### **Tunngavilersuut:**

Maannakkorpiaq Cairn Energy plc-ip uuliaqarnerasoq paasiniarlugu misissueqqarnermik qillerinera oqallisigineqarpoq. Oqallinneq annertunerusumik Greenpeace-ip tusarniaanermut atatillugu akissutaanni isornartorsiutaannik imaqartoq aallaavigineqarpoq.

Matumani pineqartumi paasissutissat pisullu eqqortut annertunerusumik paasisaqarfigerusullugit apeqqutit qulaani allaqqasut nalinnaasumik innuttaasut akornanni oqallinnermi iluaqutaasussatut isigalugit saqqummiuppakka.